



INSTRUMENTU TESTU FOTOGRAFIA BA FOIN-SA'E



Rekoñesimentu

Instrumentu Testu Fotografia Ba Foin-sa'e

Ami rekoñese apoiu hosi Ministériu Juventude, Desportu, Arte, no Kultura, no Ministériu Turizmu no Ambiente ba sira-nia koordinasaun no orientasaun.

Ho kontribuisaun hosi:

Adolexente no foin-sa'e sira hosi grupu oin-oin hanesan estudante, lider foin-sa'e, grupu ambiente, labarik-feto no jovem-feto sira, ema ho defisiénsia, no LGBTQI+ hosi munisípiu Dili, Viqueque, no Lautém, ne'ebé partisipa iha konsultasaun no teste iha kampu, no fahe sira nia esperiénsia, perspetiva, no hanoin sira durante dezvoltamentu ba matadalan ida-ne'e.

Hirak-ne'e inklui Amigo de Jesus, São Pedro, Sagrado Coração de Jesus, CAFÉ, An-Nur, Colegio São João Paulo II, KAY-RALA, Colegio Santo Inácio de Loyola, ESTV – ETI, UNTL, DIT, UCT, ESG CALIXA, Cristal, ICS, ESGP 4 de ESG CALIXA, Cristal, ICS, ESGP 4 de Setembro, ESG Lere, ESG Konis, ESG CAFÉ, Vocational no.1, Laudato Si' Movement de Timor-Leste, Alumni LCOY Timor-Leste, APFTL, SOA-TL, RYLA-TL, KHS, AJAR, UC-TL, BERNABAD, SBHMDU.

Sira nia kontribuisaun signifikativu tebes hodi ajuda forma konteúdu, linguajen, no instrumentu hodi asegura katak dokumentu ne'e relevante, inkluzivu, apropriadu kulturalmente, no amigavel ba foin-sa'e sira.

Deklarasaun:

Matadalan ida-ne'e nu'udar rekursu edukasionál ne'ebé ho intensaun atu apoia aprendizajen no envolvimentu foin-sa'e sira iha asaun klimátika. Ida-ne'e simplifika mudansa klimátika, advokasia, no konseitu polítika ba objetivu edukasionál nian no la troka polítika ofisiál governu ka dokumentu sira hosi Konvensaun Enkuadramentu Nasoins Unidas ba Mudansa klimátika (UNFCCC).

Série Módulu no Instrumentu Mudansa Klimátika Amigável ba Foin-sa'e sira ne'e hetan finansiamentu hosi Korea International Cooperation Agency (KOICA).

Oinsá atu Uza Rekursu ne'e?

Série Módulu no Instrumentu Mudansa Klimátika Amigável ba Foin-sa'e hanesan rekursu sira ne'ebé dezenvolve atu hakbiit ka empodera adolexente no foin-sa'e sira iha Timor-Leste, liuliu ba sira ne'ebé ho idade 15 to'o 28, liuhosi fornese rekursu aprendizajen kona-ba mudansa klimátika, permite asaun klimátika ne'ebé informadu, inkluzivu, no tuir kontestu lokál.

Rekursu sira-ne'e maka:

- 1 Módulu Mudansa Klimátika
- 2 Matadalan Asaun Klimátika
- 3 Instrumentuba Asaun Klimátika
- 4 Matadalan Akordu Internasionál Klimátika
- 5 Matadalan Governasaun Klimátika
- 6 Instrumentu Testu Fotografia
- 7 Instrumentu Glosáriu Klimátika

Instrumentu Testu Fotografia ida-ne'e hanesan rekursu **daneen hosi Série Módulu no Instrumentu Mudansa Klimátika Amigável ba Foin-sa'e**. Ida-ne'e dezeña atu ajuda foin-sa'e sira iha Timor-Leste atu explora, komprende, no fahe istória sira kona-ba klimátika liuhosi fotografia no espresaun kreativu. Rekursu ida-ne'e disponivel iha lian rua: **Inglés no Tetun**. Versaun rua ne'e ho intensaun atu asegura asesibilidade no komprensaun ba ema hotu.

Oinsá atu Uza Matadalan ida-ne'e?

1 Haree didi'ak foto ida-idak

Instrumentu Testu Fotografia ida-ne'e ba ita-boot atu esplora, refleta, no fahe ideia sira kona-ba mudansa klimátika iha ita-boot nia comunidade.

2 Liga ba kategoria sira

Uza seksaun lima, ***Impaktu Klimátiku, Asaun foin-sa'e, Natureza & Biodiversidade, Solusaun Klimátika & Adaptasaun, no Kultura, Fiar & Klimátika*** hodi gia ita-boot nia hanoin. Husu ba ita-nia an: "Fotografia ida-ne'e pertense ba kategoria ida-ne'ebé? Foto-ne'e konta istória kona-ba saida?"

3 Diskusaun no fahe ideia

Halibur iha sírkulu ka grupu ki'ik ida, ko'alia kona-ba saida maka ita-boot haree, fahe ita-boot nia ideia sira, no rona ema seluk.

4 Hatama ita-boot nia istória rasik

Ita-boot bele hasai ita-boot nia fotografia rasik, hakerek *caption/deskrisaun*, *dezeña*, ka halo papél saida maka akontese iha fotografia hodi esplora istória ho klean liután.

5 Troka ideia

Uza fotografia hanesan pontu inísiu ida atu hanoin kona-ba asaun, solusaun, ka esperiénsia sira iha ita-boot nia comunidade. Laiha resposta ida mak "loos", ideia hotu-hotu ajuda ita atu harii komprensaun no inspira ema seluk.

Uza Instrumentu Testu Fotografia ida-ne'e atu haree ita-boot nia comunidade, refleta kona-ba **esperíensia réal, no halo konversa no divertidu**, fahe no aprende ho belun sira!

Tabela Kontéudu

- 2 Rekoñesimentu
- 3 Oinsá atu uza rekursu ida-ne'e?
- 4 Oinsá atu uza matadalan ida-ne'e?
- 5 Introdusaun
- 6 Tabela Kontéudu
- 7 Natureza no Biodiversidade
- 15 Kultura, Fiar no Identidade
- 24 Vulnerabilidade
- 30 Impaktu Klimátiku
- 36 Solusaun Klimátika no Adaptasaun
- 44 Asaun Foin-sa'e

INTRODUSAUN

Mudansa klimátika sai hanesan dezafiu boot ida iha ohin loron, no foin-sa'e sira mak baibain hetan afeitadu liu, maibe sira mós ema ne'ebé bele halo diferença réal. Sira lidera asaun, inspira comunidade, no kria futuru ida-ne'ebé di'ak liu ho pasu ki'ik iha kada momentu.

Iha Timor-Leste, foin-sa'e sira sente efeito hosi mudansa klimátika, hahú hosi tempu ne'ebé estrañu no natureza ne'ebé estragadu to'o problema ho serbisu, kultura, no moris loroloron nian. Maibé sira mós halo hela asaun, lidera projetu lokál, no buka solusaun hodi ajuda sira-nia comunidade.

Instrumentu Testu Fotografia iha ne'e atu ajuda foin-sa'e sira kaptura no fahe istória kona-ba mudansa klimátika liuhosi foto no lejenda badak sira. Instrumentu ne'e ita fahe ba kategoria lima: **Natureza no Biodiversidade, Kultura, Fiar no Identidade, Vulnerabilidade, Impaktu Klimátika, Solusaun Klimátika & Adaptasaun, Asaun Foin-sa'e**, no orienta foin-sa'e sira atu hasai foto furak sira, konta istória simples, no hatudu esperiênsia loloos sira. Ida-ne'e mós hanorin konta istória ho étika, nune'e respeito ema hotu .

Instrumentu ida-ne'e la'ós de'it atu aprende, maibé fonte inspirasaun ida ne'ebé divertidu. Tau ida-ne'e iha ita-boot nia meza, loke ida-ne'e bainhira sente baruk, buka ideia sira, ka haree oinsá ita-boot nia asaun ki'ik sira bele halo diferença boot. Liuhosi fahe ita-nia istória, foin-sa'e sira bele inspira ema seluk, hasa'e konxiênsia, no ajuda harii Timor-Leste ida ne'ebé forte liu, matak liu, no nakonu ho esperansa.



NATUREZA NO BIODIVERSIDADE



Iha tasi-ibun Akrema, iha illa Ataúro, ai-huun ida-ne'ebé uluk hamriik besik tasi-ibun kor-azul, sai hanesan símbolu ikóniku ida husi fatin ne'e. Ai-hun nia modelu hamriik iha tasi-ibun ne'e koñesidu tebes to'o bainhira ema haree nia foto iha *online*, sira hatene kedas katak ida-ne'e iha Akrema. Ikus mai, erozaun iha tasi-ibun neineik-neineik halo ai nia abut sai fraku, to'o monu no lakon. Ohin loron, ai-hun ne'e hela de'it iha memória no fotografia. ***Ai-hun hira tan maka tenke lakon molok ita hatene katak furak ne'ebé hale'u ita ne'e vulneravel ka fraku tebes?***



Fotografia ida-ne'e kaptura ai-laran ne'ebé metin iha Tutuala, parte husi Parke Nasional Nino Konis Santana. Kanopi matak loos, riku ho biodiversidade, no paisajen ne'ebé la hetan estraga hatudu beleza natureza ne'ebé sei nafatin eziste iha Timor-Leste. Hanesan parke nasional ida, fatin ida-ne'e mak uma ba ai-horis no animál sira ne'ebé úniku no hala'o papél importante hodi proteje ekosistema ba jersaun sira iha futuru. Ida-ne'e fô-hanoin mai ita katak ita-nia ai-laran iha valor boot tebes, no proteje sira importante liu fali buat hotu.



Dircia SB/LSM-TL/Hera/2022

Dader-saan ida, iha dalan boot Hera nian, lekirauk sira tuur hakmatek hela iha estada-ibun besik ai-parapa laran. Lekirauk sira-ne'e koñesidu ho amigavel, no viajante barak mak dalabarak para hodi haree, halimar ho sira, ka fó hahán. Ba ema barak, momentu ne'e hanesan koneksaun simples ida, no kontente ho animál fuik sira. Maski nune'e, iha fatin seluk, ema balun sei buka no oho lekirauk sira hodi hetan ai-han. Haree lekirauk sira iha ne'e, fó-hanoin mai ita katak importante tebes proteje animál fuik no sira nia hela-fatin.



Mariano/SOA-TL/ Vatuva/2023

Ida-ne'e hanesan área protesaun komunitária ida iha tasi-ibun Timor-Leste nian, ema lokál sira halibur hamutuk atu tau matan ba rekursu ne'ebé hale'u sira. Ai-huun, uma mahon, no tasi-ibun kria paizajen moris nian ne'ebé ema no natureza moris hamutuk. Liuhosi sira-nia esforsu koletivu, tasi-ibun sai forte liu, animál fuik sira hetan hela-fatin ne'ebé seguru, no asegura mós tradisaun lokál sira. Asaun idak-idak refleta comunidade nia kompromisu ba reziliensia, moris-di'ak, no futuru sustentavel, hatudu katak proteje ambiente mós kona-ba salvaguarda dalan moris ba jerasaun sira tuir mai.



Mariano/SOA-TL/Tibar/2023

Iha Timor-Leste nia tasi-ibun, ai-parapa ki'ik ne'e hamriik nu'udar símbolu reziliénsia no esperansa nian. Ninia abut sira sei la proteje de'it ita-nia tasi-ibun hosi laloran tasi no anin-boot sira, maibé mós absorve karbonu, hodi ajuda ita-nia illa kombate mudansa klimátika. Ninia sanak sira to'o iha kalohan, oferese uma-mahon no fatin ba ikan, ne'ebé sustenta comunidade lokál sira. Ida-ne'e fó-hanoin mai ita katak ema ne'ebé tau matan maka'as ba sira-nia rai no rekursu mós bele sai nu'udar guarda ba ita-nia illa, tasi no jersaun sira iha futuru.



Octavio Araujo/Atauro/2024

Moris la'os eziste deit iha rai leten. Iha Timor-Leste nia tasi okos, iha mós mundu ketak ida, vibrante no nakonu ho surpresa.

Ita-boot hanoin ona mundu tasi-okos nian ne'e oinsá los?

Iha Metinaro, grupu boot ikan nani liuhosi korál kór oioin sira nia leten, rikusoin subar ida ne'ebé sustenta comunidade lokál no inspira tradisaun sira. Proteje ekosistema tasi sira-ne'e signifika prezerva meu-moris, haburas biodiversidade, no fó onra ba ligasaun kle'an entre Timor-oan no sira-nia tasi — lembransa ida katak ita-nia illa furak lu'an tebes iha superfísie nia okos.



Husi tasi moos to'o foho-matak, Timor-Leste nakonu ho buat furak. Ema halibur hamutuk iha ne'e atu hariis, halimar, no haksolok ho kolega no família, hodi halo memória iha tasi laran. Tasi no foho sira hatudu oinsá rai no bee iha ligasaun, nakonu ho moris no enerjia.

Proteje fatin sira-ne'e importante tebes atu nune'e jersaun sira iha futuru bele kontinua haksolok ho laloran, dalan sira, no momentu ne'ebé kontente.

Kada vizita ba iha tasi fó-hanoin mai ita katak ita-nia illa espesial tebes no importante tebes atu ita tenke tau matan ba sira.



Haree liuhosi lagoa kór-azúl, illa Jaco eziste no nakonu ho mistériu. Ninia rai-henek mutin no bee ne'ebé kristál/moos sente hanesan mundu ketak ida, iha fatin ne'ebé natureza nafatin fuik no livre. Haree de'it ida-ne'e halo ita apresia Timor-Leste nia illa sira-nia furak no kontente tebes tanba fatin sira-ne'e besik ita.

Ne'e fatin ida atu esplora, mehi, no fó-hanoin katak proteje nafatin ita-nia nasaun nia fatin furak sira-ne'e ba ema-hotu no jersaun sira tuirmai.



Haree tok ikan Nemo sira ne'ebé kór oioin, nani iha duut-tasi no ahu-ruin sira-nia leet iha tasi laran!

Ita surpresa tebes atu haree buat moris hotu-hotu ne'ebé iha ita-nia oin. Timor-Leste nia tasi nakonu ho surpresa, no idak-idak hatudu mundu ida-ne'ebé naroman, moris, no valór atu proteje. Husi ikan ki'ik to'o ahu-ruin, iha buat barak atu esplora. Momentu sira hanesan ne'e fó-hanoin ita katak natureza-nia milagre sira la dook hosi ita - sira iha loos ita-nia comunidade, hein ita atu deskobre no tau matan ba sira.



Ita-boot haree ona filme Moana?

Iha Adara, iha Illa Atauro, ita bele esperiênsia májiku no ligasaun hanesan entre ema no tasi. Tasi-ibun ho rai-henek mutin, hamutuk ho fahi no manu sira ne'ebé la'o livre ba mai, halo ambiente sai moris no atrativu. Laloran tasi ne'ebé kalma tebes, no ita bele haree diretamente ba ai-laran no foho sira hosi dook. Komunitade nia bero ida namlele ho nonook, la'o tuir ritmu tasi nian. Iha Ataúro, tasi halo parte moris loron-loron nian, belun ida, no matadalan ida.



Azelio da Cruz/Atabae/2024

Hateke ba ai-huun boot ne'e, ninia sanak-oan sira sai hanesan ita-nia isin-lolon nia uat no aas loos. Ida-ne'e forte, moris, no nakonu ho istória sira, ho abut klean iha Timor-Leste nia rai.

Hamriik iha nia okos, ita-boot bele sente oinsá natureza liga buat hotu-hotu—pasadu, prezente, no futuru. Ai-hun sira hanesan ida-ne'e fó hanoin mai ita katak ita halo parte iha buat ida ne'ebé boot liu, no kuidadu sira signifika kuidadu ita-nia an rasik, ita-nia comunidade, no ita-nia illa. Sira la'ós de'it hanesan ai-hun —sira maka moris no família.



Jorguino Savio/Adara/2025

Iha Adara, loro-matan monu iha uma tradicionál ida nia oin iha tasi-ibun, ho nuu-huun sira hale'u. Kór sira furak tebes, hanesan pintura moris-reál nian.

Bainhira ita haree ba fatin ida-ne'e, ita sente hanesan fatin perfeitu atu ba hakalma-an —la iha estres, laiha distraun, so iha deit ita, tasi no natureza. Ida-ne'e fatin ida atu halimar, pasa tempu, no goza beleza simples Timor-Leste nian.

Momentu sira hanesan ne'e fó hanoin mai ita importante atu moris ho kalma ka neneik (*slow down*), sente livre, no goza (*enjoy*) mundu ne'ebé hale'u ita.



Jorguino Savio/Tutuala/2025

Hosi foho Paichau nia leten, ita bele hateke tun ba Lágoa Iralalaru ne'ebé luan, hale'u ho parke naturál nia furak Timor-Leste nian.

Foho, bee no kalohan hanesan buat furak atu haree. Hamriik iha ne'e, halo ita sente moris, buat furak boot ida, no liga ho rai ne'e. Parke naturál ne'e nakonu ho buat moris, kór furak, hakmatek, no hatudu katak ita-nia illa furak tebes.

Esperiénsia ne'e fó-hanoin ita atu proteje fatin espesiál sira-ne'e, atu nune'e ema hotu bele goza ka aproveita sira-nia furak ba tinan hirak oin mai.



Jorguino Savio/Tutuala/2025

Iha fatin balun iha Parke Nasional Nino Konis Santana, iha ai-huun boot ida - ami la hatene ai-hun ne'e tinan hira ona! Ninia abut boot no luan tebes, hanesan ai-hun boot sira ne'ebé ita baibain haree iha Amazónia.

Furak tebes mai ita atu hatene katak Timor-Leste mós iha ai-hun gigante sira. Haree ida-ne'e halo ita para no hanoin moris ne'ebé eziste ona iha tempu naruk nia laran, no hanoin mós kona-ba importánsia atu proteje lejenda moris sira-ne'e.

Natureza subar nafatin surpreza inkrível sira, no ita-nia illa Timor nakonu ho gigante sira ne'ebé hein hela ita atu deskobre.

2

**KULTURA, FIAR NO
IDENTIDADE**



Yoga/BVI/Iliknamu/2024

Iha Iliknamu, Biqueli, Ataúro, peskadór ida soe boia ida hodi marka zona Tara Bandu iha tasi. Ida ne'e parte ida hosi jestaun tasi-ibun bazeia ba comunidade iha Timor-Leste, ema lokál sira serbisu hamutuk hodi proteje moris tasi nian. Boia hatudu katak barreira fatin-peska, no fó tempu ba ikan atu boot no buras. Ida ne'e asaun simples maibé forte, ne'ebé lidera husi tradisaun no regra comunidade nian. Tara Bandu fó-hanoin ita katak tau-matan ba tasi mak responsabilidade ema hotu-hotu nian, proteje tasi nune'e kontinua fó -benefisiu ba família no kondisaun moris-di'ak ba jerasaun sira tuirmai.



Ricardo/BVTL/Ainaro/2025

Bikan-masa kór oioin ho malus-tahan, bua, no lafatik. Buat hirak-ne'e haree simples, maibé sira iha signifikadu ne'ebé klean. Iha ita-nia kultura, sira simboliza respeitu, unidade, no onestidade, lori ema hamutuk iha serimónia Tara Bandu, ita-nia lei tradisionál ambientál ne'ebé estabelese regra comunidade nian atu proteje natureza. Liu fali tradisaun, sira representa ita-nia kompromisu fahe ba kultura, armonia, no salvaguarda ambiente.



Ricardo/BVTL/Selihasan/2024

Maneira ida ne'ebé comunidade Timoroan sira halo hodi proteje rai no tasi mak liu husi ita-nia lei kostumeiru ne'ebé forte, ne'e mak **Tara Bandu**. Iha rituál ne'e, ema see manu-tolun, manu, malus, no bua, ho lian ida no hodi katuas sira-nia matenek fó onra ba sira ne'ebé uluk liu ita. Tara Bandu la'ós de'it tradisaun—ne'e promessa ida atu tau matan ba ambiente no buat moris hotu. Ida-ne'e fó hanoin mai ita katak ita-nia identidade iha abut, iha fiar no buat hirak-ne'e hamutuk, tantu ema no natureza, bele mantein ita-nia illa buras nafatin ba jersaun sira tuirmai.



JosueAlwyn/LSM-TL/Ostico/2026

Batar maka parte ai-han ida iha Timoroan-nia moris, fó han família no forma tradisaun sira. Maioria comunidade sira depende ba udan atu kuda batar, no bainhira udan tun, komesa kuda batar, ho esperansa no kuidadu. Bainhira batar moris no prontu ona atu koileta, ita celebra ho rituál ida naran '**sau-batar**', signifika fó bensaun ba ai-horis no fó agradese ba rai. Batar musan idak-idak haktuir istória kona-ba moris, kultura, no reziliénsia. Ida-ne'e hatudu oinsá Timor-oan iha ligasaun klean ho natureza no tradisaun sira ne'ebé orienta sira.



Me. Julia/LSM-TL/Metinaro/2023

Madre kuda ai-hun ida, hodi hatudu katak ita hotu halo parte iha Maromak nia kriaun. **Laudato Si'** fó hanoin mai ita katak buat hotu iha ligasaun—rai, bee, ema, no buat moris hotu. Nu'udar Maromak nia oan, Ita fiar katak ita iha responsabilidade atu tau matan ba mundu ne'ebé hale'u ita. Ai-hun idak-idak ne'ebé ita kuda maka hahalok domin nian ba kriaun, ajuda natureza atu buras no proteje uma ne'ebé Maromak fó mai ita. Ne'e hatudu katak fiar no asaun la'o hamutuk bainhira ita haburas no proteje ita-nia illa.



Dircia SB/LSM-TL/Liquica/2022

Iha parte balun iha Timor-Leste, molok uza bee-matan ne'ebé foin ke'e/baku, comunidade sira hala'o rituál sagradu hodi husu lisensa ba natureza no bei'ala sira. Ema halibur atu husu matak-malirin no matadalan, ida-ne'e hatudu respeito ba bee-matan sira ne'ebé fó moris no sustenta sira.

Serimónia ida-ne'e fó hanoin mai ita katak ita-nia identidade no sobrevivência iha ligasaun kle'an ho rai no bee. Hodi fó onra ba espírito no tradisaun sira-ne'e, ita aprende atu kuida ita-nia ambiente, hodi garante katak bee-moos kontinua sulí ba ita-nia comunidade sira agora no ba jersaun sira tuirmai.



Iha ai-hun tuan ida nia okos, peskadór Timoroan sira ho pasiénsia soru sira-nia rede —abilidade ne'ebé hatutan husi jersaun ba jersaun. Artezanatu ida-ne'e la'ós de'it serbisu; ida-ne'e maka hun ida ba sira-nia identidade, ne'ebé liga sira ba família, comunidade, no tasi.

Sira kaer ikan la'ós atu sai riku, maibé atu kaer ikan ne'ebé natoon hodi sustenta sira-nia família no sustenta sira-nia moris.

Kada Nodu no lasu lori istória, lisaun, no tradisaun sira, hatudu oinsá kultura no natureza iha ligasaun.



Timor-Leste nia uma tradicionál sira harii tuir natureza, uza ai-akadiru ka fibra ai-tali-metan ba uma leten no ai ba estrutura. Uma idak-idak hanesan símbolu kultura no sustentabilidade nian, dezeña atu sai forte, malirin, no amigavel ba ambiente.

Ida-ne'e hatudu oinsá comunidade aproveita maximu saida mak natureza oferece, respeita natureza.

Moris iha uma sira-ne'e fó-hanoin ita katak kuidadu ba ambiente la'ós de'it kona-ba proteje ai-laran ka mota sira — ne'e mós kona-ba kria moris ida ne'ebé koopera ho fatin iha ita-nia sorin-sorin.



JosueAlwyn/LSM-TL/Ostico/2026

Iha Maubisse, família kuda repollu iha sira to'os ki'ik no fa'an iha merkadu lokál sira. To'os sira-ne'e bele ki'ik, maibé sira suporta sira-nia moris no mantein tradisaun sira. Kada kolleita reprezenta agrikultór sira-nia serbisu maka'as no ligasaun ba rai, ajuda comunidade sira moris ho sustentável no fó onra ba kultura Timor nian.



Maria Dias/Metinaro/2024

Nani iha tasi-okos Timor-Leste nian, ita bele sente buat moris nia furak ne'ebé haleu ita. Ahu-ruin boot sira hamriik aas hanesan uma, fó protesauñ fatin ba ikan barak/oioin no kriatura sira seluk. Ida-ne'e maka comunidade ida moris ne'ebé vibrante, moris iha tasi okos, nakonu ho kór no enerjia. Ba nasaun-illa ida hanesan ita-nian, moris iha tasi okos ne'e parte ida hosi ita-nia identidade, hatudu oinsá ita iha ligasaun ho tasi.



Azelio da Cruz/Tutuala/2025

Hosi dook ita haree illa ki'ik ida iha tasi sorin, naran '**Jaco**', iha Timor-Leste.

Maske illa kiik ida, nakonu ho beleza natural. Illa ne'e hale'u ho tasi-kor-azúl moos, kalma, no rai-henek-mutin. Illa ida-ne'e hanesan rikusoin ne'ebé subar hela no espesiál loos, hanesan mós ita-nia identidade no patrimóniu.

Natureza no kultura hamutuk hodi forma istória Timor-Leste nian, ita tenke orgullu hodi hatudu ba mundu. Tanba ne'e, ita tenke proteje illa furak ne'e.



Dircia SB /LSM-TL/Dili/2018

Estátua '**Cristo-Rei**' hamriik aas iha fatuk-boot leten, iha Fatucama, hateke ba Dili, tasi, rai, loro-matan hosi leten. Marka ida ne'e hateten kedas ba mundu katak fatin ne'e iha Timor-Leste.

Hateke ba 'Cristo-Rei' la'ós deit hanesan estátua bain-bain, ida-ne'e hanesan símbolu ba Timor-Leste nia identidade, istória, fiar, no forsa. Nomós fó hanoin mai ita kona-ba ita-nia ligasaun ho rai no tasi, no inspira ita atu proteje ita-nia natureza, kultura, no comunidade.



Dircia SB /LSM-TL/Viqueque/2022

Be'e Tudak Loi-Huno nu'udar fatin espesial ida-ne'ebé hatudu identidade Ossu nian no furak natureza Timor-Leste nian. Bainhira halo viajen ba Viqueque, ema dalabarak para iha ne'e hodi fase sira-nia oin ka fase sira-nia liman no ain, aproveita bee ne'ebé malirin liga ho natureza.

Ida-ne'e maka maneira simples ida atu halo kakutak-malirin, sente moris, no apresia paizajen sira durante viajen nia laran.




Aga Moniz/TYIFD/Baucau/2023

Hare nakonu iha natar laran tanba Agrikultór sira kuda, prepara ai-han báziku hodi sustenta nasaun, hanesan mós iha nasaun sira seluk iha rejiaun Ázia. Ema-Timor depende ba foos nu'udar hahán loroloron nian—hosi dadeer to'o kalan. Etu mak parte hahán prinsipál. Bainhira la'o iha natar laran ita bele haree agrikultór sira sebisu maka'as, ho pasiensia. Foos la'ós de'it hahán — ida-ne'e kultura, tradisaun, no símbolu moris nian, hatudu hela ba ita oinsá comunidade serbisu ho natureza hodi fó-han ba sira-nia an no prezerva sira-nia eransa.



Zita Auxiliadora/Lospalos/2023

Iha Lospalos, uma lisan sira úniku no nakonu ho karakter, hatudu identidade Lautém nian. Uma hamriik aas hateke kalohan, uma lulik ida-ne'e liga ita ba ita nia bei'ala sira enkuantu hateke ba futuru. Ne'e maka fatin ida ne'ebé kultura, istória, no comunidade moris. Uma nia parte hotu-hotu, inklui ai, uma-kakuluk, eskultura sira hateten ninia istória rasik.



Azelio da Cruz/Atabae/2025

Ai-kameli nu'udar ai-horis nativa hosi Timor-Leste, ai-hun ida ne'ebé lori istória, kultura, no morin hosi ita-nia illa. Infelizmente, ai-kameli barak lakon durante kolonizasaun, maibé ohin loron nafatin buras iha parte balun iha nasaun ne'e, hodi fó hanoin mai ita kona-ba ita-nia abut no reziliénsia.

Ai-kameli la'ós de'it iha valór tanba nia morin—ne'e parte ida husi ita-nia identidade, tradisaun, no ligasaun ba rai.

Proteje ida-ne'e hatudu oinsá Timor-oan sira tau matan ba sira-nia patrimóniu naturál, hodi garante katak ai-hun ikóniku ida-ne'e kontinua buras ba jersaun sira iha futuru no mantein ita-nia illa sira-nia istória moris.



LSM-TL/Dili/2021

Aprende la'ós akontese deit iha klase laran. Ho orientasaun husi irmán relijioza ida, foin-sa'e sira pasa tempu iha liur, explora natureza no aprende lisaun sira kona-ba rai, ai-hun, no bee.

Fiar no kuriozidade mai hamutuk, hatudu katak komprende mundu la'ós deit husi livru sira, maibe liu ida ne'e.

Momentu sira-ne'e hanorin respeitu ba kriasaun, serbisu iha ekipa, no importante atu kuidadu ambiente.

3

VULNERABILIDADE



Dalan ne'ebé comunidade uza atu ba sidade ne'e la metin, fasil loos atu hetan estragu bainhira udan boot. Bainhira tempu udan, dalan ne'ebé ema asesu hodi kolleita ai-han bele lakon no nakonu ho tahu.

La'o ba fa'an sasán, sosa ai-moruk, bá eskola dalaruma la di'ak — dalaruma imposivel.

Iha fatin hanesan ne'e, vulnerabilidade ne'e la'ós konseitu teoria maibé realidade loron-loron nian, no comunidade-nia moris hetan afeitadu maka'as bainhira dezastre akontese.



Bibi-timur sira iha rai maran buka du'ut atu bele moris. Durante tempu udan, fasil atu hetan ai-han. Maibé bainhira tempu rai-maran, du'ut lakon no animál sira dezaraska atu buka hahán.

Ba família barak iha Timor-Leste, bibi-timur la'ós hanesan pekuária de'it - bibi mak familia sira-nia reseita no sira-nia subsisténsia/moris. Bainhira rai ne'e la bele fó tan ai-han ba bibi sira, família sira lakon sira-nia fonte importante ba rendimentu no seguransa.

Iha rai sira hanesan ne'e, mudansa iha tempu/klima uitoan de'it bele determina animál no família sira bele tahan moris ka lae.



Iha parte barak, iha Timor-Leste, mota mak dalan úniku ne'ebé ema tenke hakur hodi to'o ba sira-nia uma. Durante tempu udan, udan boot bele halo mota sira-ne'e boot, sulin maka'as no perigozu. Perigozu loos atu hakat liu, no dalaruma lakon-vida. Maibé iha tempu bailoron, mota sira-ne'e maran, dalaruma iha de'it bee uitaun ba comunidade nia nesesidade loroloron no ba atividade agricultura. Mudansa mota sira-ne'e hatudu oinsá mudansa klimátika afeita liu ba comunidade sira-ne'ebé depende ona ba natureza.



Gabion ida-ne'e atu proteje comunidade husi inundasaun, maibé estrutura sira ne'ebé forte mós bele sai vulneravel ba mudansa klimátika. Anin-boot maka'as, rai-monu, no inundasaun maka'as bele estraga nafatin fatin ne'e. Protesaun ba konstrusaun presiza tempu, no iha nasaun ida-ne'ebé menus dezvoltidu hanesan Timor-Leste, fundu limitadu no prioridade ki'ik halo ema iha risku boot liu tan. Ba família sira, anin-boot mai dala ida de'it bele sobu sira-nia uma, eskola, no to'os.



JosueAlwyn/LSM-TL/Baucau/2026

Iha komunidad balun, iha Timor-Leste, hare bele kuda iha tempu udan de'it.

Agrikultór sira depende loos ba udan-been tanba irigasaun limitadu. Bainhira udan mai, natar sira bee nakonu ho moris no esperansa. Maibé bainhira udan mai tarde ka uitoan liu, natar sira nafatin maran no mamuk.

Kolleita hahan, no komunidad-nia seguransa ai-han, depende ba ritmu inserteza kalohan nian.



JosueAlwyn/LSM-TL/Viqueque/2026

Iha fatin barak, labarik no família sira la'o ba mota hodi hetan bee-moos. Sira tau fatuk hale'u bee atu mantein seguru hodi hemu—buat ida ne'ebé ita haree iha fatin barak, maibé laos fásil.

La'o dook, lori bee todan, no bee ne'ebé la seguru afeita saúde no halo moris sai susar tebes, liuliu ba labarik-feto sira.

Ita-boot iha bee natoon iha uma? Ka ita estraga bee ka uza laho kuida? Imajina se ida-ne'e maka ita-boot nia rutina loroloron nian.



JosueAlwyn/LSM-TL/Viqueque/2026


Komunidade barak iha área ne'ebá depende ba solusaun provizóriu bainhira harii infraestrutura loloos lori tempu naruk liu. Ponte ai ida-ne'e permite ema atu atravesa ba sidade, maibé ida-ne'e frajil no risku. Udan boot ka bee-sa'e bele estragu ponte ai ne'e, no ema ne'ebé atravesa bele monu. Ida-ne'e hatudu oinsá comunidade sira moris ho saida maka sira iha, maibé mós oinsá sira sai vulneravel ba mudansa klimátika no tempu ne'ebé estremu.



JosueAlwyn/LSM-TL/Viqueque/2026

Posu konkretu frajil ida-ne'e laos de'it beematan ida — ida-ne'e hanesan liña moris nian ba comunidade. Durante tempu bailoro, bee nível tun, asesu ba bee sai difisil no obriga ema la'o dook ba beematan sira seluk.

Saneamentu ne'ebé ladún di'ak no falta manutensaun aumenta risku ba saúde, liuliu ba labarik no labarik-feto sira ne'ebé dalabarak ba kuru bee. Tempus estremu hanesan manas ka udan-boot bele estraga posu ka halo maran posu. Infraestrutura ne'ebé limitadu, finansimentu ne'ebé ki'ik, no mudansa klimátika kombina hodi halo buat ne'ebé simples hanesan bee-hemu sai dezafiu loroloron iha Timor-Leste.



Dircis SB/LSM-TL/Ermera/2024

Família ida hela besik mota, inundasaun neineik-neineik kauza rai monu. Sira-nia uma no to'os iha risku tanba moru protesaun hetan estragu no seidauk harii foun fali.

Durante tempu udan, buat ne'ebé sira bele halo maka hein no reza atu sira-nia uma bele hetan salva. Hanesan ai-hun boot ne'ebé besik, kaer metin ho abut klean, família ida-ne'e kaer metin sira-nia rai no moris, hatudu reziliénsia maski iha risku klimátiku sira ne'ebé ameasa sira-nia uma tinan-tinan.



Dircia SB/LSM-TL/Ermera/2024

Iha aldeia barak, uma-kain barak laiha kanu ka torneira iha uma. Sira halo kanál ki'ik ida hosi bee-dalan uza au atu nune'e bee bele suli ba fatin ida ne'ebé fasil liu atu nalihun ka kuru. Família sira, liuliu labarik no labarik-feto sira, lori bee ne'e fila ba uma hodi tein, hemu, no fase sasan.

Ida-ne'e solusaun lokál simples ida, maibé ida-ne'e hatudu oinsá moris loroloron nian depende ba mota no bee-dalan sira, no oinsá falta infraestrutura ne'ebé di'ak halo bee sai susar no risku ba comunidade sira.

4

IMPAKTU KLIMÁTIKU



Iha Timor-Leste, udan-boot no mudansa klimátika dalabarak estrada estrada no halo estrada sira monu. Infraestrutura ne'ebé frajil no finansiamentu ne'ebé limitadu signifika katak problema sira ne'e akontese beibeik. Bainhira estrada sira kotu, comunidade sira buka dalan atu to'o iha eskola, merkadu, no servisu saúde sira. Agrikultór sira labele transporta produasaun kolleita, no ajuda emerjénsia nian lori tempu naruk liu atu to'o. Akontesimentu sira-ne'e hatudu oinsá mudansa klimátika laos de'it afeita ambiente - ne'e estrada moris loroloron nian, kondisaun moris nian, no oportunidade sira, hodi halo reziliensia sai dezafiu ba comunidade Timoroan sira.



Iha fatin barak, iha Timor-Leste, rai-monu sai hanesan ameasa komún ida, liuliu ba família sira ne'ebé hela besik ba foho-lolon sira ne'ebé la metin. Uma sira ne'ebé harii besik foho-lolon hasoru perigu maka'as, tanba udan-boot bele derepente rai monu no halai mai iha sira-nia uma okos.

Komunidade sira iha ne'e moris ho inserteza loos, hatene katak dezastre bele estraga uma, to'os, no kondisaun moris. Sira ne'ebé vulnerável liu maka dalabarak ema sira ne'ebé laiha opsaun seluk maibé hela besik área sira ne'ebé risku, hatudu oinsá mudansa klimátika no infraestrutura limitadu tau moris iha risku kada tempu udan.



JosueAlwyn/LSM-TL/Viqueque/2026

Krize klimátika ne'ebé aumenta maka'as halo mota sira iha Viqueque sai boot liután, hodi hamosu erozaun kada tinan. Bee nalihun neineik-neineik halakon rai, ameasa ekosistema no comunidade sira ne'ebé besik. Ida-ne'e laos de'it akontese iha Viqueque - impaktu hanesan ne'e kuaze akontese iha Timor-Leste laran tomak, mota sira kontinua habelar no muda/forma rai ne'e tinan-tinan.

Família, agrikultór no uma sira besik beedalan sira-ne'e hasoru risku boot, hatudu oinsá mudansa klimátika afeita ambiente no ema nia moris loroloron iha nasaun ne'e.



JosueAlwyn/LSM-TL/Viqueque/2026

Laos ema hotu iha asesu ba bee-moos. Bainhira krize bee sai aat liután tanba mudansa klimátika, feto no labarik sira tenke la'o dook, dalaruma sa'e kuda ka la'o ho kuda atu bele to'o iha bee matan.

Viajen sira-ne'e sai hanesan lembransa ida kona-ba susar iha moris loroloron nian bainhira rekursu báziku sira sei menus no impaktu klimátiku sira halo susar liután asesu ba bee.



Dircia SB/LSM-TL/Manatuto/2024

Moru mota iha Manatuto nakfera dadauk ona, hatudu impaktu hosi bee suli maka'as no klima estremu. Karik moru ne'e nakfera hotu, natar sira ne'ebé besik ne'e importante tebes ba família sira — fasil tebes hetan estragu.

Komunidade sira hanoin-hikas fali katak sira lakon ona ai-han durante siklone Seroja iha tinan 2021, no mudansa klimátika halo akontesimentu sira-ne'e akontese beibeik liután. ***Oinsá ita-boot sei sente bainhira lakon ita-boot nia ai-han no rendimentu kada tempu udan?*** Ida ne'e hatudu oinsá mudansa klimátika laos de'it ameasa ba rai maibé mós ema nia moris iha Timor-Leste.



Dircia SB/LSM-TL/Manatuto/2024

Iha comunidade ida, iha Manatuto, fahe bee entre família sira, presiza oras -ba-oras atu kuru bee. Labarik no feto sira gasta sira-nia tempu barak liu atu la'o, hein, no enxe sira-nia masa jerigen, maski tempu sira ne'e bele uza ba estuda, halimar, ka halo buat ruma ne'ebé produtivu.

Ida ne'e hatudu oinsá mudansa klimátika no asesu ba bee limitadu afeita moris loroloron nian, hodi obriga comunidade sira atu adapta maneira sira ne'ebé lori impaktu todan ba edukasaun, oportunidade, no infánsia.



Dircia SB/LSM-TL/Camea/2023

Iha comunidade balu iha Camea, Dili, susar atu hetan bee-moos. Família sira hela iha foho leten no tenke la'o tun hodi to'o iha bee-matan. Ho kuidadu, sira enxe fali sira-nia masa jerigen turuk ba turuk, hafoin tau iha bote hodi lori/hi'it ka tutur.

Viajen sira-ne'e presiza tempu no esforsu, hatudu oinsá moris loroloron nian forma hosi luta atu hetan bee. ***Oinsá maka ita sente, loron-loron gasta oras barak atu hetan de'it buat ne'ebé ita presiza atu moris?***



Dircia SB/LSM-TL/Uatulari/2022

Mota iha Uatulari, Viqueque, sai luan, hamonu rai neneik-neneik no fó ameasa ba natar ne'ebé comunidade depende ba.

Área ida-ne'e uluk koñesidu tebes ba produsaun hare lokál, maibé inundasaun agora halakon ona rai balun.

Ho infraestrutura ne'ebé limitadu ka frájlil, risku ne'e aas liután, hodi tau família sira-nia ai-han no moris iha perigu laran.



Octavio Araujo/Metinaro/2024

Ita-boot hanoïn ona oinsá mudansa klimátika afeita moris iha tasi okos? Tasi fó mai ita oksijéniu barak liu duké ai-laran sira iha rai-maran, no tasi sai hanesan uma ba kriatura barak tebes, barak maka seidauk deskobre. Maibé temperatura ne'ebé sa'e halo ahu-ruin sai kamutis, estraga animál tasi sira nia uma. Hanesan nasaun Pasífiku sira seluk, Timor-Leste mós sente hela impaktu hirak ne'e. Karik ahu-ruin sira lakon, laos de'it tasi maka sofre — ita-nia comunidade sira ne'ebé depende ba tasi mós iha risku.



Média-GPM/Dili/2026

Haree didi'ak! fatin ida-ne'e haree familiár ka lae? Sim, ne'e *Pantai Kelapa* iha Dili.

Tasi-ibun ida-ne'e uluk iha rai-henek furak no fatin atu nani, joga futeból, no halimar. Maibé mudansa klimátika hasai tiha ona ida-ne'e.

Nivel tasi sa'e afeita daudaun Timor-Leste hanesan mós ho illa sira seluk. Maski ho barreira sira, tasi-been to'o nafatin iha tasi-ibun, hodi estraga dalan/estrada sira no halo fatin hirak-ne'e sai la seguru. ***Presiza kustu hira mak atu harii fali fatin ne'e? No memória infánsia hira maka sei lakon tan?***

5

SOLUSAUN BA KLIMA & ADAPTASAUN



Bartolomeo Belo/Aileu/2018

Iha estrada hosi Dili ba Aileu, udan boot bele halo rai monu no halakon rai, halo viajen sai perigozu. Atu hapara ida-ne'e, ema sira harii moru gabion – arame-homan ne'ebé nakonu ho fatuk – monta iha foho-lolon sira. Moru sira-ne'e atu tahan rai, proteje estrada, no mantein comunidade sira-nia ligasaun. Ida-ne'e dalan simples maibé matenek atu adapta ba mudansa klimátika, hatudu oinsá solusaun ida-ne'e bele halo comunidade nia moris sai seguru no forte liu iha área foho Timor-Leste nian.



Dircia SB/LSM-TL/Liquica/2018

Iha área rurál sira, iha parte Liquiçá nian, bee-moos iha folin boot ba moris loroloron nian. Iha ne'e, membru comunidade sira harii hela barreira beton ki'ik hale'u beematan ida hodi proteje husi rai-rahun, sedimentu, no kontaminação. Asaun simples ida-ne'e, ne'ebé lidera hosi comunidade, halo bee hemu sai seguru no saudavel ba família sira. Atu tau matan ba sira-nia bee-matan, ema sira adapta ba tempu ne'ebé muda, prezerva bee ba ema hotu, no hatudu oinsá solusaun ki'ik sira bele halo diferença boot hodi mantein comunidade rurál sira sai forte no resiliente iha Timor-Leste.



Josue Alwyn/LSM-TL/Viqueque/2026

Kuadru informasaun ida ne'e iha Ossu ajuda comunidade aprende kona-ba risku anin boot no oinsa atu mantein seguru. Ho tempu ne'ebé predisaun inserteza liu tanba mudansa klimátika, importante atu hatene saida maka presiza halo **antes, durante**, no **depois** anin-boot ka tempestade ida akontese. Ferramenta simples sira hanesan kuadru avizu ida-ne'e hanorin ema hotu oinsá atu preparadu, proteje uma, eskola, no família sira, no hatudu oinsá fahe koñesimentu nu'udar parte xave ida atu harii reziliência iha comunidade Timor-Leste nian.



Mariano/SOA-TL/Tibar/2023

Foin-sa'e sira kuda ai-parapa nu'udar parte ida hosi Timor-Leste nia esforsu ba adaptasaun klimátika bazeia ba natureza, hodi ajuda harii fali ai-laran/floresta sira iha tasi-ibun ne'ebé estabiliza tasi-ibun no proteje hasoru erozaun no tasi sa'e.

Restaurasaun ai-parapa iha Tibar hetan ona apoiu liuhosi parseria ho organizasaun lokál sira no Timor Port nia zona konservasaun, ne'ebé ai-oan rihun ba rihun mak kuda hodi konserva biodiversidade no reziliénsia tasi-ibun.

Área ai-parapa saudavel sira mós atrait vizitante ba paseiu iha natureza no haree manu-fuik sira, loke oportunidade foun ida ba eko-turizmu no atividade subsisténsia ne'ebé lidera hosi foin-sa'e sira.



Dircia SB/LSM-TL/Dili/2023

Iha sentru resiklajen Caltech Group iha Beduku, kontentór kinor nabilan ida bolu ema atu lori sira-nia botir no plástiku uzadu sira, envezde soe iha dalan ka lixu fatin nakloke. Iha Timor-Leste, lixu plástiku taka bee-dalan no tasi-ibun sira no kontribui ba poluisaun, pontu soe ne'e ajuda nakfilak lixu ba rekursu ida.

Plástiku sira ne'ebé halibur hamutuk hodi halo resiklajen ba plaka edifisiu, pavimentu/trotoár sira, no produktu sira seluk ne'ebé útil, hodi hamenus lixu, hamenus emisaun gás ho efeitu estufa, no apoia ekonomia sirkulár ne'ebé fó benefísiu ba comunidade no inkui mós natureza.



Elton/AFoCO-026/Balak-Manatuto/2024

Iha Foho Balak, Manatuto, ema sira ke'e rai iha foho hodi kaptura udan-been — dalan tradisionál atu rai bee no ajuda rai buras nafatin durante tempu rai-maran. Bee ne'ebé kolleita ona ne'e uza hodi rega ai-horis foun sira ne'ebé kuda iha rai-tetuk sira ne'ebé degrada ona, nu'udar parte ida hosi esforsu reflorestasaun ne'ebé hetan apoiu hosi projetu AFoCO no Diresaun Jerál Floresta nian hodi restaura rai ne'ebé estraga hosi desflorestasaun no rai-maran.



Azelio da Cruz/Tutuata/2025

Senáriu ne'e hatudu rusa sai hodi hemu bee moos iha *Illa Jaco*, parte hosi Parke Nasionál Nino Konis Santana iha parte leste Timor-Leste nian. Jaco normalmente laiha fonte bee-moos, nune'e animál fuik sira hanesan rusa sira-ne'e buka bee — liuliu iha tempu bailoro naruk bainhira bee naturál maran. Atu ajuda sira moris, governu no parseria sira instala sistema desalinizasaun tasi-been ba bee-moos hodi fó ba rusa no animál fuik sira seluk. Ida-ne'e maka dalan simples maibé importante loos atu apoia natureza, proteje biodiversidade, no ajuda animál sira adapta ba mudansa klimátika.



Isaura/LSM-TL/Aileu/2025

Iha parte balun iha Timor-Leste, agrikultór sira uza estufa hodi kuda ai-horis hanesan pimenta, tomate, no modo-tahan-matak bainhira tempu iha liur manas liu, udan boot, ka tempu inserteza. Tradisionalmente, agrikultór sira depende ba kuda iha liur, maibé mudansa klimátika lori temperatura manas loos, rai-maran, no udan-boot ne'ebé bele estraga ai-horis sira. Estufa sira kria espasu kontroladu hodi proteje ai-horis sira hosi loro-matan no tempu manas maka'as, ajuda produz ai-han fresku tinan tomak, no hametin sistema ai-han lokál sira. Téknika agrikultura intelijente ba klima sira-ne'e ajuda agrikultór sira hadi'a produsaun, hetan rendimentu, no harii agrikultura ne'ebé reziliente liu iha Timor-Leste.



JosueAlwyn/LSM-TL/Viqueque/2026

Tuir estrada foun hosi Ossu ba Viqueque, ema kuda hela ai-horis hanesan ai-kakeu no espésie lokál sira seluk tuir auto-estrada hodi tahan rai no prevene erozaun. Iha Timor-Leste nia tempu udan, foho-lolon sira ne'ebé mamuk fasil atu monu, hodi hamosu rai-halai ne'ebé estraga estrada sira no taka asesu ba eskola, merkadu, no uma sira. Hodi kuda ai-horis, comunidade sira proteje rai ho natural, asegura estrada, no harii reziliénsia ba tempu naruk ba mudansa klimátika. Barreira verde sira-ne'e mós ajuda hamenus karbonu, hadi'a paizajen, no apoia meiu-moris lokál sira.



Grupu Botir Matak nakfilak hela botir vidru tuan sai sasan ne'ebé util hanesan vazú, boluseira, no dekorasaun. Hodi tesi no transforma lixu ho kuidadu ba buat foun, sira hamenus lixu, proteje ambiente, no kria valór hosi sasán sira ne'ebé maka atu soe. Serbisu kreativu ida-ne'e hatudu oinsá comunidade sira bele pratika resiklajen no resiklajen-kreativa, inspira foin-sa'e sira atu kuidadu natureza no buka dalan matenek atu uza filafali materiál loroloron nian.



Ita-boot haree ona sistema idropóniku iha Kios Matenek? Iha ne'e, modo-tahan sira moris iha uma laran laho rai, uza bee no nutriente sira. Iha fatin barak iha Timor-Leste, modo-tahan fresku sira susar atu asesu durante tempu udan ka iha área urbana sira ho rai disponivel uitoan de'it. Idroponika oferese solusaun matenek ida: agrikultór ki'ik sira bele forma grupu, harii sira-nia sistema rasik, no kuda produktu fresku sira durante tinan tomak. Ida-ne'e maka ezemplu di'ak ida kona-ba agrikultura ne'ebé matenek ba klima, lori teknolojia simples ba comunidade sira no ajuda ema atu han ho saudavel enkuantu adapta ba mudansa tempu nian.



JosueAlwyn/LSM-TL/Manatuto/2026

Haree painél solár sira-ne'e iha uma-kakuluk Escola SGP Kay Rala nian iha Manatuto! Instala hosi Projetu Transformasaun Verde Pasífiku ho apoiu hosi Governu Japaun, sira ajuda lori enerjia ne'ebé moos no konfiável ba eskola. Antes, eletrisidade mate halo susar atu uza komputadór no klase dijitál sira. Agora, estudante sira bele uza laboratóriu ICT, komputadór, no internet ho konsistente — maski bainhira rede la funsiona. Ida-ne'e maka solusaun matenek ba klima ne'ebé uza enerjia renovável hodi hamenus emisaun sira no hadi'a oportunidade aprendizajen nian ba foin-sa'e sira iha Timor-Leste.



JosueAlwyn/LSM-TL/Dili/2026

Ita haree ona bloku konkritu boot sira-ne'e iha estrada Pantai Kelapa no hatene saida mak sira halo ka se sira troka tasi-ibun nia furak? Iha Timor-Leste, tasi sa'e no laloran ne'ebé maka'as loos — sai aat liután tanba mudansa klimátika — estraga daudaun estrada no rai iha tasi-ibun, nune'e barreira sira-ne'e ajuda proteje rai no dalan/estrada sira atu labele lori tasi-been hodi estraga. Tau bloku konkritu sira maka forma ida ba adaptasaun klimátika nian, hodi ajuda ema sira-nia asesu no seguru maski tasi sai boot liután.



MateusSoares/Ermera/2026

Iha Ermera, grupu foin-sa'e EAMO (Ermera Ai-Kulat Mutin Orgániku) kuda kulat-mutin iha uma laran uza tékniku to'os ne'ebé simples. Hahú hosi foin-sa'e lokál sira iha tinan 2018, empreza ki'ik ida-ne'e hatudu oinsá inovasaun bele kria ai-han no empregu iha Timor-Leste. Kulat moris iha fatin ne'ebé kontroladu uza materiál agríkola sira hanesan ai-uut/hare-uut, ne'ebé halo sira sai apropriadu maski iha fatin ne'ebé rai limitadu. Kulat sira-ne'e riku ho proteína no nutriente, ajuda hadi'a labarik sira-nia nutrisaun nomós apoia rendimentu lokál. Ida-ne'e maka ezemplu matenek ida kona-ba produsaun ai-han iha uma laran no agrikultura ne'ebé matenek ba klima, hodi transforma koñesimentu lokál ai-han saudavel ba comunidade sira.



Elton/AFoCO-026/Balak-Manatuto/2024

Foto ne'e hatudu lisaun importante hosi reflorestasaun iha Timor-Leste. Iha lutu laran, du'ut saudavel no moris di'ak. Iha lutu liur, ita haree rai maran tanba animál sira la'o livre no han ai-horis/du'ut sira ne'ebé sei ki'ik. Karau no bibi sira han du'ut livre maka komún iha área rurál barak no dala barak estraga ai-horis no vejetasaun foun sira. Liuhosi proteje área restaurasaun sira ho lutu, comunidade sira fó tempu ba ai-horis sira atu moris no fó-tempu ba rai atu recupera.

6

FOIN-SA'E SIRA HALO
ASAUN



Underwater Cinema/Dili/2024

Iha Cristo Rei, grupu foin-sa'e Underwater Cinema (UC) orienta maluk foin-sa'e sira hodi esplora tasi no deskobre moris tasi Timor-Leste nia furak. Lihosi atividade nani, hamoos tasi-ibun, no edukasaun tasi nian, UC ajuda foin-sa'e sira haree ahu-ruin, ikan sira, no mundu ne'ebé subar iha tasi okos. Grupú ne'e kria atu inspira Timor-oan barak liután hodi kompriende no proteje sira-nia tasi, tanba ema barak nunca haree saida mak eziste iha tasi-okos. Hodi esperiênsia hamutuk, foin-sa'e sira aprende atu hadomi tasi no halo asaun hodi proteje tasi.



LSM-TL/Dili/2025

Durante Semana Laudato Si', no atu celebra tinan 10 Laudato Si', foin-sa'e sira iha Timor-Leste tun ba dalan hodi sensibiliza kona-ba kuidadu ita nia planeta. La'o hamutuk hosi Areia Branca to'o Cristo Rei, sira lori poster no mensajen sira ne'ebé bolu ema atu proteje natureza no ita-nia ambiente. Inspira husi mensajen "kuidadu ba ita-nia uma komún" husi Papa Francisco, marxa pasífika ida-ne'e hatudu oinsá foin-sa'e sira uza sira-nia lian hodi enkoraja comunidade sira atu foti asaun ba planeta no harii futuru ida ne'ebé sustentável liu.



Mariano/SOA-TL/Liquica/2023

Emosaun nakonu iha tasi-ibun bainhira foin-sa'e sira ho kuidadu husik fali lenuk-tasi nia oan sira ba tasi. Atividade ne'e hetan orientasaun husi grupu foin-sa'e konservasaun Lenuk Tasi, ne'ebé hala'o kna'ar hodi proteje balada tasi iha Timor-Leste. Voluntáriu sira ajuda salva lenuk-tasi nia oan sira hosi tasi-ibun, proteje sira to'o sira moris, no husik lenuk-tasi oan sira ho seguru ba tasi, hodi fó sira oportunidade di'ak atu moris. Eventu sira ne'e mos hanorin foin-sa'e no comunidade sira kona-ba konservasaun tasi nian.



Mariano/SOA-TL/Liquica/2023

Estudante no foin-sa'e sira hamriik hamutuk, kaer liman iha sirkulu haleu sira-nia akampamentu durante *SOA Timor-Leste Ocean Heroes Bootcamp*. Akampamentu loron tolu ne'e lori estudante sekundária sira besik liu ba tasi atu nune'e sira bele aprende kona-ba moris tasi nian, konservasaun tasi nian, no importánsia atu proteje Timor-Leste nia ekosistema tasi ne'ebé riku. Liuhoi atividade sira hanesan workshop, restaurasaun ai-parapa, no konservasaun lenuk-tasi nian, partisipante sira hetan koñesimentu no inspirasaun atu sai "*Ocean Heroes*" iha sira-nia comunidade rasik.



Dircia SB/Dili/2025

Atividade ida-ne'e hanaran Biblioteca-Umanu, ema fahe sira-nia esperiênsia pesoál ba malu ho foin-sa'e sira. Envezde lee livru, partisipante sira rona istória loloos no aprende hosi ema seluk, husi fuan ba fuan. Ida-ne'e kria espasu seguru ida ba diálogo, komprensaun, no ideia foun sira. Iha konversa sira hanesan ne'e, joven sira bele ko'alia nakloke kona-ba dezafiu sira hanesan mudansa klimátika no solusaun komunitária sira. Hodi fahe istória sira no rona perspectiva oioin, foin-sa'e sira sai konxiente liután, inspiradu, no prontu atu foti asaun ba futuru ida ne'ebé di'ak liu.



Dircia SB/TYIFD/Dili/2019

Iha atuasaun pantomima ida-ne'e, peskadór ida sai ba tasi ho esperansa atu kaer ikan — maibé nia hasai lixu plástiku. Senáriu ne'ebé forte tebes ne'e hatudu problema poluisaun tasi nian ne'ebé buras daudaun iha tasi Timor-Leste nian. Aprezentasaun ne'e organiza hosi Timorese Youth Initiative for Development (TYIFD), uza arte no teatru hodi hasa'e konxiénsia kona-ba protesaun ambientál. Liuhosi konta istória ne'ebé kreativu, foin-sa'e sira ajuda comunidade sira atu refleto kona-ba oinsá poluisaun plástiku prejudika tasi no meu-moris sira. Ida-ne'e fó hanoin mai ita katak proteje tasi hahú ho muda ita-nia toman loroloron nian.



LCOY-TL/LSM-TL/Dili/2024

Foin-sa'e sira mós bele influensia polítika klimátika. Liuhosi Konferénsia Lokál Foin-sa'e (LCOY) Timor-Leste, foin-sa'e sira halibur hamutuk hodi aprende kona-ba mudansa klimátika, fahe ideia, no diskute solusaun ba sira-nia rain. Organiza tinan-tinan husi Movimentu Laudato Si' Timor-Leste, eventu ne'e eduka no kapasita foin-sa'e sira atu ko'alia. Hamutuk, partisipante sira dezenvolve Deklarasaun Nasionál Juventude kona-ba Klimátika, ne'ebé kontribui ba Deklarasaun Juventude Globál hodi apresenta iha Konferénsia ONU ba Klimátika (COP). Ida-ne'e hatudu katak lian foin-sa'e sira hosi Timor-Leste bele ajuda forma diskusaun klimátika globál no inspira asaun iha rai laran.

Publikadu hosi UNICEF Timor-Leste
Iha parseria ho Governu Timor-Leste
Dili

timorleste@unicef.org
www.unicef.org/timorleste/

©United Nations Children's Fund (UNICEF), Juñu 2026

unicef 
for every child